

L'engaschi da la Giuventegna Rumantscha

GiuRu ni Giuventegna Rumantscha è in'uniun ch'è vegnida fundada per promover ils contacts tranter las differentas regiuns idiomaticas en il Grischun e la diaspora. Ella è in'uniun affiliada da la Lia Rumantscha e gioga ina rolla impurtanta en il sustegn finanziel e da comunicaziun per realiar projects che promovon il rumantsch. Ma tge munta quai concretamain? – Ina invista en la lavur da la GiuRu da l'onn passà.

Naomi Arpagaus e Leta Arpagaus/GiuRu

L'emprima occurrenza dal 2022 è stada il mars la radunanza generala cun scarsolada a Savognin. Cun schlantsch ha la suprastanza entschet l'onn nov e quai cun beneventar *Leta Arpagaus* da Vella sco nova cassiera e *Manuel Sonder* da Savognin sco nov ulteriur assessur. Cun trametter las brevs d'invit a las commembras ed ils commembers, èsi dà en egl, che la GiuRu sa cumpona anc adina per gronda part da persunas en la vegliadetgna tranter 25 e 30 onns. La dumonda resta, co cuntanscher meglier las persunas giuvnas tranter 16 e 24, e co vegnir encunter als basegns da la nova generaziun?

Nova pagina d'internet

Intern ha la suprastanza regularmain discussiunà quest onn las structuradas da sia uniun. Tar las sesidas hai dà planisaziuns ed elavuraziuns da concepts e strategias per modernisar la GiuRu. In'idea concreta ch'i ha dà tras quai è stada la renovaziun da nossa pagina d'internet giuru.ch ch'è vegnida messa en la rait cun in nov design il december 2022. Ella duai pussibilitar da retschaiver spert ina survista dals projects e da las pussaivladads da sa participar en la GiuRu a moda activa ni era sco commember/commembra passiv/a.

En la rubrica da scriver «Zulprins» che la GiuRu edescha ussa gia dapi dus onns en La Quotidiana sa rimnan texts ed intervistas davart tematicas actualas e per part era internaziunalas. Las sesidas redacziunalas avertas dattan spazi da barattar ideas per temas e formats interessants che fatschentan la glied.

A las scuntradas cumadaivlas èn insaquants/as Rumantschs/as s'entaupads/as en lieus ordaifer las regiuns rumantschas. Quest onn han trais da quellas scuntradas gi lieu: a Berna, Turitg ed a Cuira. In'ulteriura hai anc dà en il territori rumantsch, a Glion.

Scuntrar autras minoritads

Scuntradas internaziunalas han gi lieu il 2022 en Danemarc, en l'Austria ed en Rumenia. Mintgamai ina persuna da la GiuRu è sa participada per represchentar la vista da la giuventegna rumantscha ed emprennder d'enconuscher autras minoritads linguisticas europeicas. Ensem cun il «Diversity Festival» en l'Austria ha suenter sis onns era

l'Europeada gi lieu, nua che duas squadras rumantschas, cun intginas personas da la GiuRu, èn sa participadas e han giugà ballapè encunter autras minoritads linguisticas europeicas. Era quest onn, il 2023, vegni a dar scuntradas ordaifer la Svizra e quai l'avrigl en l'Austria, la stad en l'Italia e l'atun en la Serbia. La GiuRu tschertga adina puspè giuvenils/as che han gust da sa participar tar uschè in event.

La stad ha la GiuRu organisà en collavuraziun cun la chasa da cultura Cularta a Laax ina saira da troccas creativa. Ils participants e las participantas èn s'avischinads/as a la veglia tradiziun sursilvana da las chartas da troccas cun disegnar, sprayar, giugar e star da cumpagnia.

Per ils dis da litteratura ha la GiuRu regalà quest onn duas giadas dus bigliets a personas interessadas.

Pitga essenziala per la GiuRu

L'onn 2022 ha la suprastanza da la GiuRu puspè survegnì bleras dumondas per sustegn en projects. La GiuRu ha uschia pudì contribuir a la realisaziun da nova musica rumantscha, concepziuns d'art e teater, festivals, sco era projects da sport che stattan en connex cun la promoziun dal rumantsch. Quella pitga è e resta essenziala per la lavur da la GiuRu. Adina puspè fa l'originalitad, la profunditad dals projects inoltrads e l'engaschi da las personas davostiers surstar e mussa che la giuventetgna s'engascha.

* La proxima occurenza che stat avant esch è la radunanza generala ils 10 da mars 2023 en il biro da la GiuRu a Cuira. Personas ch'han interess e gust da far part pon gugent prender si contact per mail sut sut giuru@giuru.ch u era vegnir sperasvi spontanamain. I vegn a dar ina saira da cumpagnia e bun da mangiar.